

आकाशवाणी जयपुर-अजमेर प्रादेशिक समाचार ।

- ओडिशा रा पुरी मांय भगवान जगन्नाथ री ऐतिहासिक रथ यात्रा रो आगाज-प्रदेश मांय भी कोटा, झालावाड़ साथै केई ठौड़ां माथे पारम्परिक श्रिद्धा रे साथै रथ यात्रावां रो आयोजन ।
- मुख्यमंत्री भजनलाल शर्मा कह्यो- शिक्षा मिनख अर समाज रे विकास रो खास आधार ।
- प्रदेश ने प्रदूषण मुक्त बणाणे अर सिंगल यूज प्लास्टिक रे उपयोग ने खत्म करणे खातिर चलायो जा रह्यो है, **जन जागरूकता अभियान** ।
- राज्य मांय न्यारी-न्यारी ठौड़ां माथे मॉनसूनी बिरखा रो दौर जारी-बीत्या चौबीस घंटां मांय चूरु रा तारानगर मांय सब सुं बत्ती 141 मिलीमीटर बिरखा दरज ।

000

ओडिशा मांय भगवान जगन्नाथ, भगवान बलभद्र, देवी सुभद्रा अर भगवान सुदर्शन री विश्व प्रसिद्ध रथयात्रा आज धर्मनगरी पुरी मांय राख्यी जा री है । राष्ट्रपति द्रौपदी मुर्मु री इण बार वार्षिक उच्छव मांय भाग लेवेली । राष्ट्रपति मुर्मु, उप-राष्ट्रपति जगदीप धनखड अर प्रधानमंत्री नरेन्द्र मोदी देशवासियां ने जगन्नाथ रथ यात्रा री शुभकामनावां दी है । राष्ट्रपति ने भगवान जगन्नाथ सुं सगळा री प्रसन्नता, शांति अर संपन्नता री कामना करी है । उपराष्ट्रपति आप रे संदेश मांय भगवान जगन्नाथ री पवित्र यात्रा सुं लोगां रा जीवन मांय प्रसन्नता अर आध्यात्मिक जागरूकता री कामना करी । प्रधानमंत्री री भगवान जगन्नाथ रे प्रति सम्मान जतायो अर कामना करी की वाणी कृपा दृष्टि देश माथे हमेशा बणी रहवे । वठिने प्रदेश मांय भी

न्यारी—न्यारी जगवा माथे आज जगन्नाथ रथयात्रावां रो आयोजन हो रह्यो है। जयपुर रा आराध्य देव गोविंद देवजी मंदिर मांय रथजात्रा जळसो मनायो जा रह्यो है। कोटा जिलां रा न्यारा—न्यारा वैष्णव मन्दिरां मांय आज भगवान जगन्नाथ री रथ जात्रा निकाळी जी। इण रे चालता भक्त जयकारां रे साथै प्रभु रे रथ ने खींच्यो। झालावाड़ जिला रा झालरापाटन मांय आज ऐतिहासिक जगन्नाथ रथ जात्रा निकाळी जा री है और ब्यौरो म्हाणा खबरनवीस सुं—

000

जैसलमेर रा रामदेवरा मांय आज बाबा रामसापीर री समाधि रा दर्शन करणे खातिर घणी संख्या मांय श्रिद्धालु पहुंच्या है। आषाढ़ माह रा शुक्ल पक्ष री दूज माथे समाधि रा दर्शन करणे रो खास महतव है। आज सुवारे तीन बज्यां ही समाधि स्थल रा पट खोल दिया गया हा। बाबा रो अभिषेक कर खास पूजा—अर्चना करी ज्यी। भीड़ ने देखता थकां पुलिस प्रशासन री कानी सुं कड़ा इंतजाम कर्या गया है। सुरक्षा ने ले र मन्दिर प्रबन्धन री कानी सुं बेरिकेडिंग करीजी है।

000

मुख्यमंत्री भजनलाल शर्मा कह्यो है कि शिक्षा मिनख अर समाज रे विकास रो खास आधार है। शिक्षा सुं ज्ञान प्राप्त कर कौशल रो विकास होवे है, जिण सुं समाज मांय सकारात्मक बदलाव लावण री खमता विकसित होवे है।

वणा कह्यो की शिक्षा आपने आत्मनिर्भर बणावे है अर बेहतर जीवन जीणे रो मार्ग प्रशस्त करे है। श्री शर्मा आज जयपुर में राजपुरोहित ग्लोबल सेंटर ऑफ एक्सीलेंस रो फीतो काट र उद्घाटन कर्यो। ई मौके माथे राखी ज्या जळसा मांय बोलता थकां कह्यो की राजपुरोहित समाज शिक्षा रे खेतर मांय अग्रणी भूमिका निभा रह्यो है। ईण छात्रावास रो निर्माण शिक्षा रो खेतर मांय समर्पण अर सामाजिक सरोकार री सच्ची मिसाल है। मुख्यमंत्री कह्यो है कि भर्ती परीक्षावां मांय पेपर लीक अर दूजी अनियमिततावां रे बारा मांय एसआईटी` ठोस कार्रवाई करता थकां 108 आरोपियां ने गिरफ्तार कर्यो है। श्री शर्मा कह्यो की प्रदेश रा मोटयारां ने रोजगार देणे खातिर इण बरस करीब 70 हजार पदां माथे भर्तियां करी जा रही है। श्री शर्मा आमजन सुं अपील करता थकां कह्या की प्रधानमंत्री नरेन्द्र मोदी कानी सुं सरु कर्या गया एक 'एक पेड़ मां के

नाम' अभियान रे तहत प्रकृति रे प्रति जिम्मेदारी रो निर्वहन करता थकां एक पेड़ जरूर लगावा।

000

लोकसभा अध्यक्ष अर कोटा बूंदी सांसद ओम बिरला ने आज कोटा रा अनंतपुरा मांय लव कुश वाटिका मांय **“एक पेड़ मां के नाम”** अभियान री सरूआत करी। इण मौके माथे **ऊर्जा मंत्री हीरा लाल नागर** साथै केई जनप्रतिनिधि अर अहलकार मौजूद रहया। ध्यानजोग है कि प्रधानमंत्री नरेंद्र मोदी रे हेले माथे देश भर मांय ओ अभियान चलायो जा रहयो है।

000

प्रदेश ने प्रदूषण मुक्त बणाने अर सिंगल यूज प्लास्टिक रे उपयोग ने खत्म करने खातिर **प्रदूषण नियंत्रण मंडल** कानी सुं मोटे स्तर माथे जागरूकता अभियान चलायो जा रहयो है। इण काम मांय न्यारा—न्यारा महकमां, स्वयंसेवी संस्थावां अर निजी संस्थावां री मदद सुं पौधरोपण रो काम कर्यो जा रहयो है। वठिने लोगां ने घर—घर जा र **सिंगल यूज प्लास्टिक** री चीजां उपयोग नी करणे खातिर प्रेरित कर्यो जा रहयो है। मण्डल री कानी सुं आ दिनां जूट अर कपडा रा थैला बॉट र **प्लास्टिक कैरी बैग्स** रो उपयोग नी करणे री शपथ भी दिलवाई जा रही है। **राज्य प्रदूषण नियंत्रण मंडल के सदस्य सचिव एन विजय** बतायों के मुख्यमंत्री भजनलाल शर्मा री प्रदूषण मुक्त राज्य री संकल्पना ने साकार करणे री कड़ी मांय प्रदेश आगे बध रहयो है अर **सिंगल यूज प्लास्टिक और प्लास्टिक कैरी बैग्स** रो उपयोग न रे बराबर होवे इण रे खातिर सार्तक जतन कर्या जा रहया है।

000

सर्वोच्च— न्यायालय मांय काल नीट—यूजी सुं जुड़योडी कई याचिकावां माथे सुणवाई व्हेला। इण मांय नुवां सिरे सुं परीक्षा करणे री मांग री याचिकावां भी भेळी है। शीर्ष अदालत री वेबसाइट माथे अपलोड करीजी वाद सूची रे मुजब **मुख्य न्यायाधीश डी.वाई.चंद्रचूड़, न्यायमूर्ति जे. बी. पारदीवाला** अर **न्यायमूर्ति मनोज मिश्रा** री पीठ रे सामी 26 याचिकावां सुणवाई खातिर सूचीबद्ध है। पढेसरी आपरी याचिकावा मांय नीट मांय कथित अनियमिततावां री एक न्यारी अर स्वतंत्र जांच री मांग

करी है। बढ़ता नीट विवाद रे बीचे केंद्र सर्वोच्च न्यायालय मांय हलफनामो दाखिल कर्यो है।

केंद्र कह्यो है कि परीक्षा मांय बडे पैमाने माथे अनियमिततावां रे किणी भी सबूत रे अभाव मांय नीट-यूजी 2024 ने दुबारा आयोजित करणे री कोई जरूरत नी है। केन्द्र ओ भी तर्क दियो है कि ई नुवी परीक्षा सुं लाखों वास्तविक उम्मीदवारां रे जीवन माथे प्रतिकूल असर पडेला। **राष्ट्रीय परीक्षा एजेसी-एनटीए** देश भर रा सरकारी अर निजी संस्थावां मांय **एमबीबीएस, बीडीएस, आयुष** अर दूजा जुड्योड़ा पाठ्यक्रमां मांय प्रवेश खातिर **राष्ट्रीय पात्रता-सह-प्रवेश परीक्षा-अंडरग्रेजुएट** राखे है।

000

केन्द्रीय कानून मंत्री अर्जुन राम मेघवाल आज बीकानेर दौरे माथे रहया। इण रे चालता श्री मेघवाल केई कार्यक्रमां मांय भाग लियो। केन्द्रीय कानून मंत्री कह्यो की आवतो केन्द्रीय बजट विकसित भारत रे संकल्प ने और मजबूत करेला।

000

प्रदेश रो खान महकमो इण बरस राजस्व प्राप्ति रो नुवो रिकॉर्ड बनायो है। **खान अर पेट्रोलियम** महकमा री शासन सचिव आनन्दी बतायो के वित्तीय बरस **2024-25** री पैली तिमाही मांय लारला वित्तीय वरस री इणी अवधि री तुलना मांय 13 फीसदी री बधोतरी रे साथे **1 हजार 977 करोड़ 26 लाख रुपया** रो राजस्व जमा व्हयो है।

लारला वित्तीय बरस री पैली तिमाही मांय **1 हजार 746 करोड़ 55 लाख रुपया** रो राजस्व भेळो व्हयो हो।

000

प्रदेश मांय लारला एक सप्ताह सुं चल री बिरखा री गति थोडी धीमी पड़ी है। लारला 24 घंटां मांय प्रदेश रा केई ठौड़ां माथे हल्की सुं मध्यम बिरखा दर्ज करी ज्यी है। राजधानी जयपुर साथै चुरू, श्रीगंगानगर, हनुमानगढ़, दौसा, करौली अर डूंगरपुर जिलां मांय कठी-कठी भारी अर कठी-कठी घणी तेज बिरखा व्ही। टोंक, सवाईमाधोपुर मांय लारला दिनां हुई तेज बिरखा सुं बनास नदी

उफान माथे है। ईण रे कारणे जयपुर-चौथ रो बरबडो-सिवाड मार्ग काले सुं बंद है। वठिने मध्यप्रदेश ने जोड़न वाळो कोटा-श्योपुर मार्ग करीब 20 घंटा बंद रहणे रे पाछे आज सुंवा रे खोल्यो गयो। मौसम महकमां रे मुजब पश्चिमी राजस्थान मांय सब सुं बत्ती चूरु रा तारा नगर मांय 141 मिलीमीटर बिरखा अर पूर्वी राजस्थान मांय करौली रे सूरुठ मांय 137 मिलीमीटर बिरखा दर्ज करीजी। मौसम केन्द्र जयपुर आज जयपुर, कोटा, भरतपुर, अजमेर, उदयपुर, बीकानेर अर जोधपुर हलकां मांय कठी-कठी बिरखा होवण री आस जतायी है। मौसम केन्द्र जयपुर रा वैज्ञानिक हिमांशु शर्मा बतायो कि काले बिरखा री गतिविधियां मांय थोड़ी घणी कमी रा आसार है।

000

प्रदेश रा न्यारा-न्यारा जिलां मांय मौसमी बिमारियां री रोकथाम अर नियंत्रण सारु स्वास्थ्य महकमो कवायद तेज कर दी है। इणी कड़ी मांय जैसलमेर शहरी खेतर मांय चिकित्सा महकमों 35 टीमां रो गठन कर्यो है। ऐ टीमां काले सुं घर-घर जा र सर्वे रो काम करेली साथे ई लोगां ने माच्छर नियंत्रण खातिर भी जागरूक करेला। चिकित्सा दल मांय एएनएम, आंगनबाड़ी कार्यकर्ता अर आशा सहयोगिनियां ने भी भेळो कर्यो गयो है।

000